

SAMÞYKKT

um sölu- og matarvagna í Rangárþingi eystra

1. gr.

Markmið

Sölu- og matarvagnar glæða sveitarfélagið menningarlífi, efla bæjarbrag og auka við fjölbreytni í starfsemi og þjónustu bæjarins.

Samþykktinni er ætlað að tryggja að vel sé að þessum málaflokki staðið, að sölustarfsemi sé í sátt við nærumhverfi sitt og að upplýsingar séu aðgengilegar og gagnsæjar.

Staðsetning matar- og söluvagna er háð stöðuleyfi sem eru gefin út skv. kafla 2.6 í byggingarreglugerð nr. 112/2010.

Ekki er gert ráð fyrir að sækja þurfi um stöðuleyfi fyrir sölu- og matarvagna til skemmri tíma en sjö daga vegna t.d. viðburða, styrktar sölu sem ekki er í ágóðaskyni, bæjarhátíða o.fl. og falla því ekki undir samþykkt þessa.

2. gr.

Starfsemi sölu- og matarvagna

Almennt gildir eftirfarandi um starfsemi matarvagna:

- Matarvagnar mega ekki skerða öryggi og aðgengi gangandi, hjólandi og akandi umferðar eða birgja glugga rekstraraðila á sölusvæðinu.
- Ávallt ber að gæta hreinlætis og er söluaðila skylt að sjá til þess að umhverfi sölusvæðis sé snyrtilegt.
- Söluaðilum er skylt að vera með sorpílát við sinn söluvagn og tæma það reglulega.
- Leyfið er háð kvöð um að útlit söluaðstöðu falli vel að umhverfinu og að efnisnotkun, ásýnd og yfirbragð sé vandað og við hæfi þar sem salan á að eiga sér stað.
- Lögð er áhersla á að söluvarningur sé viðbót við það vöruúrval sem fyrir er hjá þjónustuaðilum í bæjarfélaginu.
- Merkingar skulu vera í samræmi við reglur þessar.
- Lögð er áhersla á að söluvagnar séu með skilgreindan opnunartíma og fari eftir honum eins og hægt er.
- Forsendur fyrir notkun á götum, torgum og landi sveitarfélagsins er að björgunaraðilar, s.s. lögregla, slökkvilið og sjúkraflutningar, hafi þar ávallt greiðan aðgang og viðunandi starfsskilyrði.
- Hverjum leyfishafa er heimilt að vera með eitt standborð við hverja sölustöð, sem mega mest vera 0,8 m að þvermáli. Heimilt er að vera með borð sem hægt er að sitja við þó að hámarki fyrir 6 einstaklinga. Rangárþing eystra skaffar ekki borð og bekk.
- Leyfishöfum langtímaleyfa er óheimilt að stunda starfsemi annars staðar en leyfið kveður á um.
- Tryggja skal að ekki hljóti mengun af starfseminni.
- Leyfishafar langtímaleyfa skulu alltaf hafa leyfisbréf tiltæk.
- Leyfi er ekki hægt að framselja eða framleigja.

3. gr.

Umsóknarferli og málsmeðferð

Skipulags- og byggingarfulltrúi eða skipulags- og umhverfisnefnd hefur umsjón með leyfisveitingum, auk eftirlits og upplýsingagjafar.

Afgreiðslum skipulags- og byggingarfulltrúa geta umsækjendur vísað til byggðaráðs sem fer með úrskurðarvald um málefni matarvagna á grundvelli samþykktar þessarar. Leyfisveiting byggist meðal annars á umsóknum þar sem gerð er grein fyrir starfseminni og öðrum þáttum.

Fyrirkomulag úthlutunar byggir á „fyrstur kemur- fyrstur fær“ fyrirkomulagi og á það við um eitt leyfi að hámarki. Í því felst að umsóknir verða samþykktar í þeirri röð sem þær berast.

Úthlutun byggir á þessum meginþáttum:

- Reglunni „fyrstur kemur, fyrstur fær“
- Gæðum umsóknar og þeim upplýsingum sem þar koma fram.
- Kröfu um fjölbreytileika og mismunandi framboð á þjónustu í bæjarfélaginu.
- Forleiguréttur er í gildi fyrir þessi svæði og hefur umsækjandi sem hefur haft leyfi frá fyrra ári, forgang umfram aðra hafi hann virt samþykkt þessa.

Leyfisveiting byggir á mati á þeirri umsókn sem berst, þar sem gera skal ítarlega grein fyrir fyrirhugaðri sölustarfsemi og allri umgjörð hennar; vöruframboði, þjónustu, sölutíma/opnunartíma, staðsetningu, útliti og öllum aðbúnaði sem starfseminni fylgir. Leitast verður við að hafa fjölbreytta starfsemi á hverjum stað.

Á sölusvæðum eru tengingar við fráveitu og vatnsveitu bannaðar. Rangárþing eystra mun útvega rafmagnstengil á skilgreint athafnasvæði matarvagna og getur leyfishafi þá tengt sig við rafmagn sem greitt verður fyrir samkvæmt mæli.

Leyfisveitanda er heimilt að hafna umsóknum ef hann telur að sú starfsemi sem í umsókninni felst uppfylli ekki kröfur um sölustarfsemi og/eða að starfsemin uppfylli ekki kröfur um fjölbreytileika og mismunandi framboð á þjónustu í sveitarfélaginu. Umsóknum án tilskilinna gagna og leyfa er hafnað. Höfnun skal rökstyðja með málefnalegum hætti. Hafni leyfisveitandi umsókn þá fellur umsóknin út og næsta umsókn þar á eftir færist upp í hennar stað.

Umsóknir eru gerðar á þar til gert eyðublað inni á www.hvolsvollur.is. Umsækjandi skal gæta þess að allar upplýsingar séu réttar og sannar.

4. gr.

Eftirlit

Skipulags- og byggingarembætti og/eða umhverfis- og garðyrkjustjóri Rangárþings eystra annast eftirlit.

5. gr.

Auglýsingaskilti

Með öllu er óheimilt að setja upp auglýsingaskilti fyrir sölu- og matarvagna en heimilt er að auglýsa söluvarning á vagninum sjálfum.

6. gr.

Leyfi

Stöðuleyfi fyrir sölu- og matarvagna er skv. 2.6. kafla í byggingarreglugerð og er veitt í sex eða 12 mánuði í senn.

Sá sem vill selja matvæli eða aðra neysluvöru skal sækja um starfsleyfi til Heilbrigðiseftirlits Suðurlands samkvæmt lögum um matvæli nr. 93/1995.

7. gr.

Gjöld

Greiða skal fyrir stöðuleyfið skv. gjaldskrá skipulags- og byggingarfulltrúa Rangárþings eystra.

8. gr.

Uppsögn, lok og afturköllun söluleyfis

Eftirfarandi ákvæði gilda um uppsögn, lok og afturköllun leyfis:

- Leyfi getur hvenær sem er verið afturkallað ef ákvæði leyfis þessa eða önnur atriði leyfisins hafa verið brotin, án endurgreiðslu leyfisgjalds.
- Leyfi getur hvenær sem er verið afturkallað ef áform eru um að svæðið verði notað í opinberum tilgangi og skal þá endurgreiða leyfishafa eftirstöðvar leyfisgjalds.
- Leyfi getur verið afturkallað ef samfelld rof myndast á sölustarfsemi í meira en 30 daga.
- Leyfishafa er gert skylt að laga sig að vega- og byggingaframkvæmdum og viðburðum á götu- og torgsölusvæðum, sem geta leitt til tímabundins flutnings og/eða afturköllunar. Leyfishafa skal tilkynnt um slíkar ráðstafanir með fyrirvara. Ekki eru greiddar bætur fyrir tímabundna afturköllun á langtímaleyfum vegna veghalds eða annarra verkefna veghaldara og landeigenda, t.d. þar sem lagnir eða leiðslur hafa brostið.
- Við uppsögn leyfis hvílir sú kvöð á leyfishafa að fjarlægja söluaðstöðu, þ.m.t. alla fylgihluti og innréttingar, af sölusvæði. Ef verkið er ekki unnið innan tilgreinds tímafrests getur byggingarfulltrúi látið fjarlægja söluaðstöðu með aðstoð lögreglu og látið hreinsa sölusvæðið á kostnað leyfishafa.
- Rangárþingi eystra er heimilt að segja upp söluleyfum þessum ef breytt nýting á nærliggjandi húsnaði og umhverfi krefst þess. Uppsagnarfrestur í þessum tilfellum er 30 dagar.
- Verði misbrestur á samþykkt þessari getur leyfishafi látið fjarlægja söluaðstöðu með aðstoð lögreglu og látið hreinsa sölusvæðið á kostnað leyfishafa. Skemmdir á umhverfi sölusvæðis af völdum leyfishafa verða lagfærðar af starfsmönnum Rangárþings eystra á kostnað viðkomandi leyfishafa.

9. gr.

Ágreiningur

Úrskurðarvald um ágreining vegna þessarar samþykktar hefur byggðaráð Rangárþings eystra. Mál sem hlotist geta af samþykkt þessari skal reka fyrir Héraðsdómi Suðurlands.

10. gr.

Staðfesting og gildistaka

Reglur þessar taka gildi við samþykkt sveitarstjórnar.

Samþykkt af sveitarstjórn Rangárþings eystra þann 13. nóvember 2025